



SLUŽBENE NOVINE TUZLANSKOG KANTONA

GODINA 8 • TUZLA, PONEĐELJAK 6. AVGUST/KOLOVOZ 2001. GODINE • IZDANJE NA BOSANSKOM I HRVATSKOM JEZIKU • BROJ 9

282

Na osnovu poglavlja IV, odjeljak B, člana 33. stav 1. tačka e) Ustava Tuzlanskog kantona, donosim

UKAZ

O PROGLAŠENJU ZAKONA O JAVNOM REDU I MIRU

Proglašava se Zakon o javnom redu i miru, koji je donijela Skupština Tuzlanskog kantona na sjednici od 12. 7. 2001. godine.

Broj: 01-1307/01
Tuzla, 23. 7. 2001. godine

Predsjednik
Tuzlanskog kantona,
Mr. Selim Bešliagić, v.r.

ZAKON

O JAVNOM REDU I MIRU

Član 1.

Ovim Zakonom uređuje se javni red i mir na području Tuzlanskog kantona, (u daljem tekstu: Kanton), utvrđuju djela kojima se povređuje javni red i mir i propisuju prekršajne sankcije za postupke i ponašanja kojima se narušava i ugrožava sigurnost i lično dostojanstvo građana na javnim mjestima, mir i odmor građana u njihovim stanovima, vrijeđa moral, ometa rad organa vlasti i drugih pravnih lica, pravilno korištenje javnih objekata, ugrožava opća sigurnost imovine, prodaje, kupuje ili nudi domaći ili strani novac, propisuju uslovi i postupak za priređivanje vatrometa, sličnih priredbi, kao i uslovi i postupak za prikupljanje dobrovoljnih priloga od građana, organa vlasti i drugih pravnih lica ili na drugi način narušava javni red i mir.

Član 2.

Nazivi koji se koriste u ovom Zakonu, imaju slijedeće značenje:

1. Javni red i mir: - Pod javnim redom i mirom podrazumijevaju se postupci i ponašanja građana pojedinačno i u njihovim međusobnim odnosima, a koja su u skladu sa pravilima ponašanja o normalnom načinu života;
2. Javno mjesto: - Pod javnim mjestom, podrazumijeva se mjesto na kome je slobodan pristup neodređenom broju lica bez ikakvih uslova (ulice, trgovi, putevi, izletišta, pristaništa, čekaonice, ugostiteljske, trgovinske i zanatske radnje, sredstva i objekti javnog prijevoza, a mogu biti i sportski stadioni, igrališta, bioskopske, pozorišne i

koncertne sale, izložbene prostorije, poslovni objekti fizičkih i pravnih lica i sl.), kada se u njima održavaju javne manifestacije, kao i druga mjesta koja u određenom vremenu služe za ovakve svrhe (zemljište ili prostorije gdje se održavaju javni skupovi, priredbe, takmičenja i sl.). Kao javno mjesto smatra se i svako drugo mjesto ako je dostupno vidiku sa javnog mjesta (balkoni, terase, dvorišta i dr.), te stanovi u stambenim zgradama, kada se u njima ili iz njih narušava javni red i mir u slučajevima posebno propisanim ovim Zakonom;

3. Naročito drsko ponašanje: - Kao naročito drsko ponašanje, smatra se grubo vrijeđanje drugog lica ili drugo bezobzirno ponašanje kojim se ugrožava sigurnost građana ili kojim se može izazvati osjećanje fizičke ugroženosti, uznemirenosti i negodovanja građana.

Član 3.

Prekršaj javnog reda i mira čini:

1. ko na javnom mjestu narušava javni red i mir svadom, vikom ili drskim ponašanjem;
2. ko na javnom mjestu narušava javni red i mir učestvovanjem u tuči, zlostavljanjem ili fizičkim napadom na drugog ili ko izazove tuču, odnosno zlostavljanje ili fizički napad na drugog;
3. ko na javnom mjestu narušava javni red i mir naročito drskim ponašanjem, grubim vrijeđanjem drugog lica ili drugim bezobzirnim ponašanjem ugrožava sigurnost građana ili izaziva osjećanje fizičke ugroženosti, uznemirenosti ili negodovanje građana;
4. ko ugrožava sigurnost ili izaziva osjećanje ugroženosti drugog lica prijetnjom da će napasti na njegov život ili tijelo;
5. ko ne postupi po naredbi ili rješenju organa vlasti kojim se zabranjuje pristup ili zadržavanje na određenom mjestu ili ometa ili omalovažava organe vlasti, pravna lica koja vrše javna ovlaštenja ili njihova službena lica, odnosno odgovorna lica prilikom vršenja ili u vezi sa vršenjem službenih poslova i zadataka ili ko ne postupi na licu mjesta po određenom zakonitom zahtjevu njihovog službenog lica;
6. ko na javnom mjestu govorom, pisanjem ili slično vrijeđa vjerska, nacionalna i osjećanja rasne pripadnosti građana;
7. ko neovlašteno na javnom mjestu prodaje, kupuje ili nudi domaći ili strani novac ili papire od vrijednosti ili karte za prijevoz;
8. ko na javnom mjestu, bez odobrenja nadležnog organa, prodaje ili nudi na prodaju ulaznice za sportske i druge priredbe u većoj količini ili po cijenama višim od označenih;
9. ko na javnom mjestu pocijepa ili na drugi način uništi ili ošteti novac BiH;
10. ko iznosi ili pronosi lažne vijesti ili tvrdjenja kojima se izaziva uznemirenje građana i ugrožava javni red i mir;
11. ko ukloni, pocijepa ili na drugi način ošteti javno istaknute objave, odnosno oglase organa vlasti i pravnih lica, ako su

oni u skladu sa propisima općine, odnosno spriječi isticanje ili istiche te javne objave ili oglase suprotno propisima općine;

12. ko se drugom lažno predstavi u pogledu svoje službene ili društvene funkcije, odnosno položaja ili ko upotrijebi lažne lične podatke kao svoje ili ko potvrdi tuđe lažne lične podatke, kao i ko neovlašteno nosi službene oznake;

13. ko daje alkoholna pića pijanom licu, duševno bolesnom licu ili licu zaostalog duševnog razvoja;

14. ko na javnom mjestu koristi i posjeduje opojnu drogu i psihotropne supstance;

15. ko konzumirajući alkohol dovede sebe u pijano stanje, usljed koga dolazi do narušavanja javnog reda i mira;

16. ko prosjači ili se odaje skitnji;

17. ko navodi i posreduje na prosjačenje maloljetno lice, duševno bolesno lice ili lice zaostalog duševnog razvoja;

18. ko igra hazardnu ili drugu sličnu igru, tako da igra gubi društveno zabavni karakter ili ko za to iznajmi, odnosno ustupi prostorije;

19. ko se odaje prostituciji ili ko iznajmi, odnosno ustupi prostorije za vršenje prostitucije;

20. ko na javnom mjestu stvara nepotrebnu buku pojačanim radom motornog vozila, prijevozom, utovarom, istovarom, upotrebom sirene ili rukovanjem audio i video tehničkim uređajima;

21. ko na javnom mjestu narušava javni red i mir izvođenjem pjesama i muzike ili reprodukcijom iste, bez odobrenja ili protivno odobrenju nadležnog organa,

22. ko u stanu stvara ili izaziva nepotrebnu buku galamom, lupanjem ili puštanjem pretjerano glasne muzike, usljed čega dolazi do negodovanja i uznemirenja građana ili stanara u stambenoj zgradi;

23. ko neopravdano zalazi ili se neopravdano zadržava u zajedničkim prostorijama (stubište, tavan, podrum, šupe, ograđeno dvorište i sl.), stambene zgrade u kojoj ne stanuje;

24. ko na javnom mjestu ustupa, prodaje, kupuje ili nudi petarde i druga pirotehnička sredstva, bez odobrenja nadležnog organa;

25. ko na javnom mjestu ili iz stana puca iz vatrenog oružja, pali rakete, petarde ili sličan eksplozivni ili zapaljivi materijal, bez odobrenja nadležnog organa;

26. ko priredi vatromet ili sličnu priredbu, bez propisane najave ili mimo zabrane nadležnog organa ili ko ne preduzme mjere obezbjeđenja koje je dužan preduzeti;

27. ko neovlašteno vrši fotografisanje i skiciranje objekata i mjesta koja su označena kao zabranjena za fotografisanje i skiciranje;

28. ko neovlašteno prikuplja dobrovoljne priloge protivno odredbama člana 6. ovog Zakona.

29. ko drži životinje mimo propisanih uslova, a koje mogu ugroziti sigurnost građana ili ih uznemiriti;

30. ko na javnom mjestu izvodi psa bez povoca i brnjice.

Prekršioce javnog reda i mira iz člana 3. stav 1. tački 1., 2. i 3. koji su zatečeni na licu mjesta ili naknadno pronađene, ovlašteni službenici organa Ministarstva unutrašnjih poslova mogu privesti dežurnom sudiji za prekršaje nadležnog općinskog suda za prekršaje radi vođenja prekršajnog postupka protiv istih.

Član 4.

Prekršaji javnog reda i mira iz člana 3. stav 1. tački od 1. do 10. i tačke 14. ovog Zakona, su i kada je prekršaj izvršen:

1. u prostorijama organa vlasti, privrednih društava i drugih pravnih lica;

2. u zajedničkim prostorijama (dvorište, stubište, podrum, šupe, tavan i sl. stambene zgrade) u kojoj je nastanjeno više stanara, kad je u te prostorije omogućen pristup i licima koja ne stanuju u toj zgradi odnosno stubištu;

3. na drugim mjestima kad je usljed blizine ili izloženosti vidiku izvršenom radnjom narušen javni red i mir.

Član 5.

Priredivanje vatrometa i sličnih priredbi mora se prijaviti policijskoj upravi Ministarstva unutrašnjih poslova Kantona (u daljem tekstu: policijska uprava), na čijem području će se priredba održati, najkasnije 8 (osam) dana prije održavanja priredbe.

U prijavi, pored ostalog, mora se navesti vrijeme, mjesto i svrha održavanja priredbe, imena lica ili generalni podaci lica koja će rukovati pirotehničkim sredstvima, količina pirotehničkih sredstava koja će se upotrijebiti, kao i mjere obezbjeđenja koje će se preduzeti.

Priredivač je dužan da sprovedi mjere obezbjeđenja koje mu rješenjem odredi policijska uprava.

Policijska uprava može zabraniti održavanje priredbe iz stava 1. ovog člana, ako procijeni da bi moglo doći do narušavanja javnog reda i mira. U tom slučaju, nadležni organ dužan je donijeti rješenje o zabrani i dostaviti ga priredivaču najkasnije 48 sati prije održavanja priredbe.

Žalba izjavljena protiv rješenja iz stavova 3. i 4. ovog člana ne odlaže njihovo izvršenje.

Član 6.

Pravna lica mogu prikupljati dobrovoljne priloge od građana, organizacija i zajednica, ako za to imaju odobrenje načelnika općine na čijem području se prilozi prikupljaju.

U zahtjevu kojim se traži odobrenje za prikupljanje dobrovoljnih priloga, pored ostalog, mora se navesti svrha i način prikupljanja, mjere koje će se preduzeti radi obezbjeđenja od eventualnih zloupotreba u vezi sa prikupljanjem, vrijeme za koje se traži odobrenje za prikupljanje, kao i područje na kojem će se vršiti prikupljanje.

Pravno lice, kojem je odobreno prikupljanje dobrovoljnih priloga, dužno je da sprovedi mjere obezbjeđenja od zloupotreba koje su određene odobrenjem za prikupljanje dobrovoljnih priloga.

Zahtjev za izdavanje odobrenja za prikupljanje dobrovoljnih priloga načelnik općine može odbiti ako prikupljanje dobrovoljnih priloga može izazvati uznemirenje građana ili narušiti javni red i mir ili ako nije opravdana svrha prikupljanja dobrovoljnih priloga.

Dalje prikupljanje dobrovoljnih priloga može se zabraniti iz razloga utvrdjenih u prethodnom stavu ili ako se ustanovi da se ne sprovede mjere obezbjeđenja od zloupotreba ili da su u zahtjevu navedeni netačni podaci o svrsi prikupljanja.

Žalba na rješenje iz prethodnog stava može se izjaviti općinskom organu određenom statutom općine, odnosno organu određenom propisom općinskog vijeća u roku od 15 (petnaest) dana od dana dostavljanja rješenja.

Žalba izjavljena protiv rješenja ne odlaže izvršenje rješenja.

Odobrenje iz stavova 1. i 2. ovog člana nije potrebno za dobrovoljne priloge:

- koji se prikupljaju u okviru pravnog lica za zajedničke potrebe ili potrebe pojedinih zaposlenika pravnog lica;
- čije prikupljanje organizuje mjesna zajednica na svom području ili kućni savjet u zgradi kojom upravlja za određenu potrebu u okviru djelatnosti mjesne zajednice, odnosno kućnog savjeta;
- koji se prikupljaju umjesto ulaznica za priredbe koje organizuju udruženja građana, sindikati i drugi oblici udruživanja i organizovanja, a u skladu sa programom njihove aktivnosti;
- koje se provodi u službenim, poslovnim prostorijama;
- koje prikupljaju humanitarne organizacije u okviru svoje registrovane djelatnosti.

Član 7.

Učinitelj će se kazniti:

1. za prekršaj iz člana 3. stav 1. tačke 1. i 30. ovog Zakona, novčanom kaznom od 50 KM.

2. za prekršaj iz člana 3. stav 1. tačke od 2. do 7. i od 9. do 11. ovog Zakona, novčanom kaznom od 100 do 1.000 KM ili kaznom zatvora do 60 dana;

3. za prekršaj iz člana 3. stav 1. tačke 8., 12., 13., 14., 15., 18., 25. i 26. ovog Zakona, novčanom kaznom od 100 do 1.000 KM ili kaznom zatvora do 30 dana;

4. za prekršaje iz člana 3. stav 1. tačke 16. i 17. ovog Zakona, kaznom zatvora do 60 dana;

5. za prekršaj iz člana 3. stav 1. tačke 19., 27. i 28. ovog Zakona, novčanom kaznom od 100 do 1.000 KM ili kaznom zatvora do 60 dana;

6. za prekršaj iz člana 3. stav 1. tačke od 20. do 24. i tačke 29. ovog Zakona, novčanom kaznom od 50 do 500 KM;

7. za prekršaj iz člana 3. stav 1. tačka 29. ovog Zakona, roditelj, usvojilac, odnosno staralac, novčanom kaznom od 50 do 500 KM;

Za prekršaj javnog reda i mira iz člana 3. stav 1. koji je učinio maloljetnik, kaznit će se roditelj, usvojilac, odnosno staralac ako je izvršenje prekršaja posljedica njihovog propuštanja dužnog staranja o maloljetniku, a u mogućnosti su da takav nadzor vrše.

Novčanu kaznu iz tačke 7. prethodnog stava, na licu mjesta izriču i naplaćuju službenici policije.

Član 8.

Novčanom kaznom od 500 do 5.000 KM, kaznit će se za prekršaj pravno lice koje iznajmi, odnosno ustupi prostorije za igranje hazardnih i njima sličnih igara, (član 3. stav 1. tačka 18.) ili za vršenje prostitucije (član 3. stav 1. tačka 19.).

Za prekršaj iz prethodnog stava kaznit će se odgovorno lice u pravnom licu ili mjesnoj zajednici, novčanom kaznom od 200 do 2.000 KM ili kaznom zatvora do 60 dana.

Vlasnik samostalnog ugostiteljskog objekta (u daljem tekstu: ugostitelj), koji iznajmi ili ustupi prostorije u ugostiteljskoj radnji za igranje hazardnih ili njima sličnih igara ili za vršenje prostitucije, kaznit će se za prekršaj novčanom kaznom od 500 do 5.000 KM ili kaznom zatvora do 60 dana.

Za prekršaj iz prethodnog stava kaznit će se lice kome je povjereno vođenje ugostiteljske radnje, novčanom kaznom od 200 do 2.000 KM ili kaznom zatvora do 60 dana.

Član 9.

Pravno lice, odgovorno lice u pravnom licu, imalac radnje ili lice kome je povjereno vođenje radnje, dužni su preduzimati mjere za održavanje javnog reda i mira u njihovim poslovnim prostorijama, kada je to moguće bez opasnosti za sebe ili drugog i slučajevite narušavanja javnog reda i mira odmah prijaviti policijskoj upravi ili službeniku policije.

Pravno lice koje ne postupi po odredbama prethodnog stava, kaznit će se za prekršaj novčanom kaznom od 200 do 2.000 KM.

Za prekršaj iz stava 1. ovog člana kaznit će se odgovorno lice u pravnom licu, novčanom kaznom od 100 do 1.000 KM.

Imalac radnje koji ne postupi po odredbi stava 1. ovog člana, kaznit će se za prekršaj novčanom kaznom od 200 do 2.000 KM, a lice kome je povjereno vođenje radnje od 100 do 1.000 KM.

Imaocu radnje ili licu kome je povjereno vođenje radnje, može se izreći zaštitna mjera "zabrana vršenja samostalne djelatnosti".

Zaštitna mjera iz prethodnog stava može se izreći u trajanju od tri mjeseca do jedne godine.

Imalac radnje koji postupi protivno izrečenoj zaštitnoj mjeri iz stava 5. ovog člana, kaznit će se za prekršaj novčanom kaznom od 200 do 2.000 KM ili kaznom zatvora do 60 dana, a lice kome je povjereno vođenje radnje, novčanom kaznom od 100 do 1.000 KM ili kaznom zatvora do 60 dana.

Član 10.

Za prekršaj iz člana 3. stav 1. tačke 7., 8., 10., 11., 14., 20., 21., 24., 26., 27. i 28. ovog Zakona, pravno lice kaznit će se novčanom kaznom od 200 do 2.000 KM, a odgovorno lice u pravnom licu, novčanom kaznom od 100 do 1.000 KM.

Član 11.

Za prekršaj iz člana 3. stav 1. ovog Zakona, može se izreći zaštitna mjera "oduzimanja predmeta" koji su bili upotrijebljeni ili su bili namijenjeni za izvršenje prekršaja ili su nastali izvršenjem prekršaja.

Licu koje je učinilo prekršaj iz člana 3. stav 1. ovog Zakona, zbog ovisnosti od upotrebe opojnih droga i alkohola i kod koga postoji opasnost da će zbog te ovisnosti i dalje vršiti prekršaj, može se izreći zaštitna mjera "obavezno liječenje alkoholičara i narkomana".

Zaštitne mjere po odredbama stavova 1. i 2. ovog člana, mogu se izreći i ako kazna za prekršaj nije izrečena.

Član 12.

Prema prirodi predmeta oduzetih po odredbi člana 11. stav 1. sud za prekršaje odredit će da li će se oduzeti predmeti prodati, uništiti ili ustupiti nadležnom kantonalnom organu ili ustanovi.

Član 13.

Službenici policije kada, u vršenju službenih poslova i zadataka, saznaju za prekršaj propisan ovim Zakonom, mogu privremeno oduzeti predmete koji su bili upotrijebljeni ili su bili namijenjeni za izvršenje prekršaja ili koji su nastali izvršenjem prekršaja, kao i predmete koji mogu poslužiti kao dokaz u prekršajnom postupku.

O privremenom oduzimanju predmeta, službenici policije licu od koga su oduzeti predmeti izdaju potvrdu koja sadrži:

- naziv i sjedište organa čiji je službenik oduzeo predmete;
- naziv, vrstu i količinu oduzetih predmeta;
- ime i prezime lica od koga su oduzeti predmeti i njegovu adresu,
- razlog oduzimanja;
- datum, vrijeme i mjesto oduzimanja;
- pečat i potpis ovlaštenog lica.

Član 14.

Općinsko vijeće može, u skladu sa ovim Zakonom propisati i druge prekršaje protiv javnog reda i mira.

Član 15.

Danom stupanja na snagu ovog Zakona, na području Tuzlanskog kantona, prestaje primjena Zakona o javnom redu i miru, ("Službeni list SRBiH", broj: 42/90).

Član 16.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina
Federacija Bosne i Hercegovine
TUZLANSKI KANTON
Skupština
Broj: 01-02-383-5/01
Tuzla, 12. 7. 2001. godine

Predsjednik
Skupštine Tuzlanskog kantona,
Dr. Izet Žigić, v.r.